

Protocol no. 25
Sezzüda da mardi, 10 lügl 2012 – 19.30-01.00

Preschaints: Albert Mayer, Andri Poo, Men Caviezel, Dumeng Jann,
Marianne Werro-Lehmann e Claudia Luppi (protocol)
Andri Linsel per la tractanda 183

Protocol

Il protocol no. 24 da la sezzüda da mardi, 3 lügl 2012 vain approvà.

183 012 EXECUTIVA
Orientaziun dal president da la cumischiun sindicatoria

Il president da la cumischiun sindicatoria orientescha al Cussagl cumünal sur dal cuntgnü da l'aboccamaint ch'el ha gnü cul capo avant la sezzüda da Cussagl da cumün in connex cun ün discuors ch'el ha gnü il di avant cun Men Luppi. Il president da la cumischiun sindicatoria giavüscha chi vegna tut a protocol ch'el haja orientà tuot il Cussagl cumünal sur da la comunicaziun da Men Luppi. Üna notizcha d'acta dal cuntgnü da l'aboccamaint es gnü dat giò davopro per metter pro'l protocol.

184 021 FABRICA
Maria e Tinet Benderer – Reconstrucziun tet da tablà, Pradè 218

Ils patrums da fabrica giavüschan da pudair reconstruir il tet donnagià tras vent la fin d'avrigl 2012. Il Cussagl decida da conceder il permiss in procedura d'annunzcha tenor la dumonda fatta.

La taxa da trattamaint importa fr. 100.--

185 021 FABRICA
Crusch Blaua – Tablina cul logo vi da la porta chà, Schigliana

Ils possessurs da la chasa da la Crusch Blaua a Schigliana vulessan francar üna tablina cun lur logo vi da la porta chà. Sco pretais illa ledscha da fabrica art. 34 es la tablina prevista in lingua rumantscha.

La taxa da trattamaint importa fr. 50.—

186 021 FABRICA
Sandra e Curdin Roner – Chamonna da giallinas, Tuffarolas

Sandra e Curdin Roner fan la dumonda da pudair metter sü suot lur stalla anit illa costa üna chamonna da giallinas movibla e sainza fundamainta. Tenor il reglamaint da planisaziun chantunal art. 40 al.20 pon dumondas per stabilimaints per adöver agricul sainza fundamainta e cun üna surfatscha fin 25m² gnir trattadas in procedura d'annunzcha.

As basond sün l'art. 40 al.20 conceda il Cussagl cumünal il permiss per la dumonda surnomnada.

La taxa da trattamaint importa fr. 50.—

187 021

FABRICA

Berta Schwarz / Ursina Stecher – Renovaziun da las spuondas da lobjia, Plazzetta 24

Las possessuras da las duos abitazuns i'l prüm e seguond plan da la chasa in Plazzetta 24 vulessan refar las spuondas da las lobjias chi sun gnüdas marschas. Previs esa da montar medemmas spuondas e lattinas sco fin uossa, las spuondas gnissan però montadas dadour il fuond da lobjia da beton e na sco fin uossa sül fuond da beton per suoglier per gronda part il beton. Implü dvantessan las lobjias da trais varts per 15 cm plü largias.

Causa chi's tratta d'ün lavur da mantegniment vain la dumonda trattada in procedura d'annunzcha, sainza publicaziun. In assenza dal schef da fabrica sco persuna involucada decida il Cussagl cumünal da conceder il permiss tenor ils plans inoltrats.

La taxa da trattament importa: 50.--

188 830

TURISSEM

Pendicularas Motta Naluns – Dumonda per demontar sur stà be üna part da las lantschas da l'implant d'innaiver

Sün dumonda da las Pendicularas Motta Naluns da pudair laschar montadas tschertas lantschas da l'implant d'innaiver sur stà, vaiva il cumün giavüschà cun charta dals 23.04.2012 d'inoltrar ün concept detaglià a regard las lantschas montadas o demontadas sül traiget d'innaiver dal territori da Sent. Las Pendicularas Motta Naluns han sün quai inoltrà il concept giavüschà. Illa discussiun fa il Cussagl cumünal las seguaints ponderaziuns: La senda da la Motta Naluns fin a Sent es üna senda fich bain frequentada dals turists chi vegnan in nossa regiun per giodair la natüra amo intacta. I'd es evidaint cha las lantschas sgradessan la cuntrada e disturbessan il purtret ed impustüt il plaschair dal giast vi da nossa natüra. In vista cha sül traiget da Sent sun avantman in tuot 36 lantschas e cha da quellas füssan previsas be 13 per laschar montadas, nun füss il respargn dal temp cun laschar montadas quistas 13 lantschas uschè enorm. Causa cha las lantschas sül traiget da Sent sun per gronda part sper la via e bain accessiblas es il Cussagl cumünal da l'avis chi saja sainz'oter pussibel da tillas demontar. Il Cussagl cumünal decida perquai da giavüschar da las Pendicularas Motta Naluns la demontascha da tuottas lantschas la prümavaira.

190 020

ADMINISTRAZIUN CUMÜNALA

Dumonda per augmentar il pensum da lavur

Cun data dals 9 lügl 2012 ha Branislava Mrkonjic Reis inoltrà la dumonda da pudair augmentar il pensum da lavur sün 50%. Tenor il Cussagl cumünal han las estructuras dal büro cumünal in vista a las duos plazzas da lavur publicadas prüma priorità. L'augmament dal pensum giavüschà ha seguonda priorità. Tuot tenor las entradas dals dossiers da candidatura po eventualmaing gnir resguardà eir l'augmament giavüschà.

192 20

SCOULINA

Installaziun d'ün büglin - Saletta in Centrala – Credit fr. 4'000.--

La saletta sün Centrala vain dovrada tanter oter da la gruppa da gö, ma eir quà o là da la scoulina sco local per zambriar. Sün giavüsch da la magistra da scoulina vain installà ün büglin sün saletta in Centrala. L'installaziun cuosta fr. 4'000.--. Il Cussagl cumünal decida da conceder il credit da fr. 4'000.—per l'installaziun dal büglin.

Permiss da parcar per veicul da sfraidir – Lavuratori Tuols

La dita Bigler AG riva 1-2 jadas l'eivna pro la bacharia Zanetti cun charrn. Our da motivs logistics stuvev la camiunetta avair ün parkegi sur not cun access vi d'ün attach electric per l'elemaint da sfraidir. Tenor las indicaziuns dal schef da vias in cumün füss il lö adattà chi po spordscher eir ün attach electric il plazzal tanter ils cuntgnaröls suotterrans ed il lavoratori. Causa cha l'indiriz per sfraidir pudess chaschunar eventualas emissiuns da canera, decida il Cussagl cumünal da conceder in üna prüma fasa ün permiss provisoric fin la fin d'october. Tenor las experienzas fattas po in seguit gnir concess ün permiss definitiv. Il permiss vain concess cun seguaintas cundiziuns:

- Il plazzal stà a disposiziun 1-2 jadas l'eivna da ca. las 20.00 fin ca. las 05.00
- La taxa da parcar importa pauschal fr. 50.--/mais
- Il consüm da forza ed ulteriuras spaisas importan pauschal fr. 100.--/mais

La taxa da trattamaint importa fr. 50.--

Broschüra d'infuormaziun

La cusgliera Marianne Werro orientescha cha la giarsuna Leta Stricker haja s-chaffi insembel cun l'actuara üna broschüra d'orientaziun per abitants novs da nos cumün. La broschüra cuntegna tuot las infuormaziuns importantas sur da nos cumün. Implü vulev la cusgliera introdüer eir ün aperitiv per bivgnantar ils abitants novs. Quist aperitiv vess d'avair lö üna jada l'on. Ils detagls vegnan amo sclerits.

Planisaziun

Il schef da planisaziun orientescha sur dal stadi actual dals differents temas da prioritä da la planisaziun cumünala chi vain amo üna jada repassada avant co tilla inoltrar darcheu per la preexaminaziun tras las instanzas chantunales. Il schef da planisaziun rapporta sur da las differents sezzüdas e discussiuns tanter oter in connex cul tema "zona da fabrica per indigens", "finischiun da la pista da sömme" e a regard la rait da sendas BAW. Implü orientescha il schef da planisaziun e fabrica ch'el ed il manader tecnic hajan gnü üna sezzüda cul possessur dal "Swissroof" a regard eventualas pussibilitats per pudair realisar ün projet. Co cha la chosa as preschainta sto però gnir inoltrà ün nouv projet.

L'actuara: